



Da nov a la suprastanza da la Lia Rumantscha appartegnan quatter persunas. (da san.) Jon Carl Thal, Maria Sedlacek, Duri Bezzola, Rino Darms e Gion Capeder.



Vincent Augustin, il president partent da la Lia Rumantscha.

FOTOS G. N. STGIER

## «Rinforzar l'unitad tranter ils Rumantschs»

Casti: radunanza da delegads da la Lia Rumantscha

DA GION NUTEGN STGIER / ANR

■ **Duri Bezzola daventa successur da Vincent Augustin sco president da la Lia Rumantscha. Sia elecziun è stada pli clera che spigada. A la fin ha l'Engiadinais fatg diesch vuschs dapli che ses concurrent Martin Mathiuet. Trais ulteriuras persunas appartegnan da nov a la suprastanza da la Lia Rumantscha.** In cumbat electoral intensiv per il presidi da la Lia Rumantscha tranter *Duri Bezzola*, Samedan e *Martin Mathiuet*, Trin è a fin. Victor da quel è cun l'Engiadinais bunamain in schenumnà «newcomer» en la Rumantschia u ditg auter ina persuna ch'è bain enconuschenta sin la tribuna politica, dentant betg sin la tribuna linguistica. Il candidat sursilvan percunter è sco quai ch'el a ditg sez a Casti in Rumantsch cun corp ed olma. Ditg pli concret conuscha Martin Mathiuet dapi quatter decennis il virivari entaifer la Rumantschia e quai en senn positiv e negativ. Tgusch pussaivel che quella vischinanza a la Rumantschia e cunzunt a la Lia Rumantscha, nua ch'il Sursilvan ha fatg part 12 onns a la direcziun è betg stada ina situaziun optimala per daventar successur da *Vincent Augustin*. Ultra da quai esi nagin misteri che Martin Mathiuet è vegni proponi per quel uffizi er da la Pro Idioms e da supponer è ch'ina rotscha dals 64 dele-

gads han betg dà perquai lur vusch al Sursilvan. Duri Bezzola ch'è da preschent il 10. president da la Lia Rumantschia è en quel senn segir pli neutral cun betg esser sto fin ussa sche activ en la Rumantschia.

### Collavuraziun cun autras organizaziuns linguisticas

Tar la radunanza da delegads a Casti han ins er gi l'impressiun che Duri Bezzola, il schef da finanzas dal Lyceum Alpinum Zuoz e deputà, saja pli tgusch la persuna integrala che ses concurrent sursilvan. Omadus han dentant persvadi cun lur votums, han chattà be buns plets per promover l'armonia tranter ils Rumantschs e per integrar tut las instituziuns ed organizaziuns rumantschas en l'avegnir da la Rumantschia e cunzunt da la Lia Rumantscha. A la fin han lura las delegadas ed ils delegads gi l'ultim pled ed elegi Duri Bezzola cun 35 vuschs tar ina pluralitad absoluta da 31 vuschs. Martin Mathiuet ha retschet 25 vuschs ed è er stà trumpà da quel resultat. Duri Bezzola dentant è sa mussà fitg ventiraivel da quel resultat excellent e prendi encunter las gratualziuns numerusas. El vul cunzunt rinforzar l'unitad tranter ils Rumantschs, intensiv la collavuraziun cun las autras organizaziuns linguisticas en noss chan-

tun e far ina analisa da la Rumantschia e da la Lia Rumantschia.

### Reelecziun da Jon Carl Thal

Vincent Augustin, Mon, il president partent da la Lia Rumantscha, ha fatg ina bilantscha da quels nov onns sco president da l'organizaziun tetgala da la Rumantschia. El ha menziunà tranter auter l'introducziun da la lescha da linguatg, l'introducziun dad in turnier da ballape per minoritads linguisticas «Europeada» ed il giubileum da 90 onns Lia Rumantschia. Per naginas discussiuns pli grondas han procurà ils tractandums statutarics. Reelegi en suprastanza da la Lia Rumantscha cun 34 vuschs è vegni *Jon Carl Thal*, Zug, da l'Uniun dals Rumantschs en la Bassa. Sia cuntercandidata *Esther Krättli*, Cuira, da l'Uniun Litteratura Rumantscha ha obtegni cun 27 vuschs in resultat respectabel. Da nov appartegnan a la suprastanza *Gion Capeder*, Casti, *Rino Darms*, Ruschein/Cuira e *Maria Sedlacek*, Sent. Ils dus novs suprastants e la nova suprastanta remplazzan *Luzia Plaz-Sonder*, Salouf, *Men Janett*, Ardez ed *Erwin Vincenz*, Vella, che sortan da quel gremium pervia dal temp d'uffizi limità. Sco suppleants han ils preschents elegi *Anna Chatarina Brunold*, (Uniun dals Grischs), *Dorote Dolf* (Uniun Rumantscha Grischun Central) e *Simon Bundi* (Surselva Romontscha).



Il nov president da la Lia Rumantscha Duri Bezzola (san.) en discurs cun Urs Cadruvi, secretari general da la Lia Rumantscha.



Cusseglier guvernativ Martin Jäger, (san.) e Benno Bossi, president da vischnanca Casti.



Ciril Berther, delegà da l'Uniun dals Rumantschs en la Bassa e Renata Bott, delegada da l'Uniun dals Grischs.



Giasts da la Lia Rumantscha a Casti èn er stads Remi Capeder (san.) e Jacques Guidon.



Martin Mathiuet, il candidat sursilvan per il presidi da la Lia Rumantscha cun sias dus figlias Milena (san.) e Marina.